

四庫全書

經部

欽定四庫全書

禹貢會箋卷二

翰林院檢討徐文靖撰

濟河惟兗州

漢書濟作汴
史記兗作沈

蔡傳曰兗州之域東南據濟西北距河蘇氏曰河濟之間相去不遠兗州之境東南跨濟非止於濟也箋

按正義曰濟河之間相去路近兗州之境跨濟而過東南越濟水西北至東河也羅平曰九州之界濟河

克淮岱徐相去不能千里荆河豫千里而羸海岱青

千里而縮荆山衡陽荆二千里而遙東海西河冀二

千里而近壽春之淮潮陽之海揚相去五六千里龍

門之河燉煌之黑雍相去且四千里華陽黑水梁窮

數千里猶未知其所終荆河淮濟之間斷長補短不

能淮海一州之半則知所制各有當矣

九河既道

蔡傳曰九河爾雅一曰徒駭二曰太史三曰馬頰四

曰覆鬴五曰胡蘇六曰簡潔七曰鈎盤八曰鬲津其一則河之經流也先儒不知河之經流遂分簡潔為二既道既順其道也箋按爾雅簡潔郭璞曰簡水道簡易絜水多約絜朱子注孟亦分簡潔為二又吳氏程曰南皮縣明有簡河何嘗合絜為一蔡傳乃合簡絜而一之非也邢曷曰九河所在徒駭最北鬲津最南蓋徒駭是河之本道東出分為八枝也然則徒駭即河之經流蔡傳謂徒駭而外別有一經流非

傳又曰按徒駭河地志云潯沱河寰宇記云在滄州
清池南許商云在成平箋按唐地志滄州清池縣有
徒駭河九域志在故滄州廢清池縣西北二十里寰
宇記在清池縣西五十里傳云南誤邢昺爾雅疏九
河所在徒駭最北鬲津最南蓋徒駭是河之本道東
北分為八枝也然則徒駭即河之經流傳云徒駭而
外別有所為經流者以簡繁誤合而為一也

傳又曰馬頰河元和志云在德州安德平原東南寰

宇記云在棣州商河北輿地記云即篤馬河也箋按

溝洫志孫禁以為可開通大河今入故篤馬河先儒

以為即馬頰唐地志德州平昌縣有馬頰河金史志

棣州商河縣有馬頰河一統志馬頰河在東光縣界

經堂邑清平二縣界東達樂陵入海又高唐州西有

馬頰河故道

傳又曰覆鬴河通典云在德州安德箋按一統志覆

鬴枯河自慶雲經海豐縣南入海

傳又曰胡蘇河寰宇記云在滄之饒安無棣臨津三

縣許商云在東光

箋

按許商謂古說九河之名有徒

駭胡蘇鬲津今現在成平東光鬲縣界中郡國志勃

海東光縣有胡蘇亭胡蘇河水經注清河又東至東

光縣西南逕胡蘇亭又東北右會大河故瀆元史云

胡蘇在慶雲西南

慶雲故無棣

傳又曰簡潔河輿地記云在臨津

箋

按方輿紀要繫

與簡相近輿地記云在臨津孔氏謂在貝州歷亭縣

誤也金史南皮縣有黎河元志簡潔在南皮城外十餘步

傳又曰鉤盤河寰宇記云在樂陵東南從德州平昌來

今德平縣

輿地記云在樂陵

箋

按水經注般縣般河蓋

亦九河之一也漢書稱公孫瓚破黃巾於般河即此瀆也元志獻縣東南八十里有鉤盤河

傳曰鬲津河寰宇記云在樂陵東西北流入饒安許商云在鬲縣輿地記云在無棣

箋

按溝洫志許商以

為古說九河之名有徒駭胡蘇鬲津今見在成平東
光鬲界中自鬲以北至徒駭間相去二百餘里今河
雖數移徙不離此域方輿紀要鬲津在鉤盤之北漢
志注平原鬲縣平當以為鬲津通典在獻縣之廢饒
安縣元志在慶雲縣又在樂陵縣西三十里一統志
云至海豐入海

傳曰太史河不知所在箋按通典曰九河四在景成
二在平原其太史簡繁未詳處所方輿紀要太史河

在徒駭之東元志太史河在南皮縣治北

傳又曰九河水道變遷難於推考而碣石通頂趾皆石不應仆沒今兗冀之地既無此石而平州正南有山而名碣石者尚在海中去岸五百餘里卓立可見則是古河自今以為海處向北斜行始分為九其河已淪於海明矣漢王橫言昔天常連雨東北風海水溢西南出浸數百里九河之地已為海水所漸鄴道元亦言九河碣石苞淪於海後世儒者知求九河於

平地而不知求碣石有無以為之證故前後異說究

無歸宿

箋

按封禪書北至碣石巡自遼西地理志碣

石在驪成西南今永平昌黎縣北相去二十里現有

碣石何得云去岸五百里也自石晉以幽薊十六州

賂契丹歷宋數百年足跡未至其地近自滄州望平

州約五百餘里何得以碣石遠在海中去平州五百

里也縱使去平州五百餘里又何得有卓立可見者

水經注曰禹貢兗州九河既道矣謂徒駭太史馬頰

覆輔胡蘇簡潔鈎盤鬲津也同為逆河蓋所潤下之勢以通河海及齊桓霸世塞廣田居同為一河故自

堰以北館陶慶陶

唐志趙州寧晉本慶陶丘

貝丘鬲般廣光信都

東光河間樂成城地並存川瀆多亡漢世河決金隄南北離其害議者欲求九河故迹而川之未知其所夫欲求九河故迹則必有故迹之處可求豈謂求之於海乎孫禁謂開通大河令入故篤馬河至海五百里豈謂至碣石五百里乎至王橫言天常連雨東北

風海水溢西南浸數百里如春秋所書宋大水類豈
風息雨霽之後宋遂淪為海乎

雷夏既澤

蔡傳曰澤水之鍾也雷夏地志在濟陰郡成陽縣西
北今濮州雷澤縣西北也山海經云澤中有雷神龍
身而人頭鼓其腹則雷然則本夏澤也因其神名之
曰雷夏也箋按山海經雷澤有雷神龍身而人頭鼓
其腹在吳西漢地志會稽吳縣具區在西古文以為

震澤郡國志吳郡吳縣震澤在西劉昭注曰越絕書
云湖周三萬六千頃有大雷山小雷山水經注太湖
有大雷小雷三山亦謂之三山湖此雷澤即震澤與
禹貢雷夏無涉蔡傳之誤因史遷舜紀舜漁雷澤正
義曰雷澤有雷神鼓其腹則雷改經文在吳西字為
則雷字而不知其非禹貢之雷澤也據漢地志曰濟
陰定陶詩風曹國也堯作游成陽舜漁雷澤故其民
猶有先王之遺風括地志曰雷夏在濮州雷澤縣郭

外西北元和志曰雷澤縣西北至濮州九十里此則
禹貢之雷澤矣近志云雷澤東西二十里南北十五
里李之藻云澤底有巉石深壑冬至前水吸而入如
巨雷鳴故名雷澤意洪水懷襄之世雷澤未陂泛濫
彌廣史稱舜漁於雷澤就時於負夏鄭玄曰負夏衛
地孫奭孟子疏曰今之東郡是也意是時雷澤負夏
或皆其澤所瀰漫故總名雷夏未可知也正義曰洪
水之時高原亦水澤不為澤雷夏既澤高地水盡此

復為澤也周禮稻人職曰凡稼澤夏以水殄草而芟夷之澤草所生種之芒種是也

灘沮會同

蔡傳曰灘水曾氏曰爾雅水自河出為灘許氏曰河灘水在宋水經汭水出陰溝東至蒙為沮灘水即汭水也箋按元和志曰灘水沮水二源俱出雷澤縣西北平地去縣十四里許氏曰灘水東入泗下流入沮韓氏謂此乃河之別流在豫州者東歷徐州境入

泗水經汭水出陰溝於浚儀縣北東至梁郡蒙縣為
濉水獲水出汭水於梁郡蒙縣北又東至彭城縣北
東入於泗蔡傳狙獾乃沮獲二字之譌

蔡傳曰晁氏曰爾雅自河出為濉濟出為濇求之於
韻沮有楚音箋按僖十九年左傳注杜預曰沮水受

汭東經陳留梁譙沛彭城縣入泗水經瓠子河出東
郡濮陽縣北河注曰禹貢濉沮會同許慎曰河濉水
也九域志曰濮州有沮溝即禹貢濉沮會同者京相

璫曰今濮陽城西南十五里有沮丘城六國時沮楚同以為楚丘非也

桑土既蠶

蔡傳曰蠶性惡濕故水退而後可蠶然九州皆賴其利而獨於兗言之者兗地宜桑後世之濮上桑間猶可驗也箋按祭義曰古者天子諸侯必有公桑蠶室大昕之朝桑於公桑風戾以食之鄭氏曰風戾之使露氣燥乃以食蠶蠶性惡濕是也秦少游蠶書序略

曰考之禹貢揚梁冀雍不貢繭物克篚織文徐篚玄
織編荆篚玄纁玳組豫篚織編青篚縠絲皆繭物也
而桑土既蠶獨言於克然則九州蠶事克為最乎夏
小正三月攝桑傳曰桑攝而記之急桑也貨殖傳齊
魯千樹桑與千戶侯等詩邶鄘衛譜東及兗州桑土
之野正義曰今濮水之上地有桑間者是有桑土明
矣

是降丘宅土

史記作下
一居土

蔡傳曰克地多在卑下水害尤甚民皆依丘陵以居至是始得下居平地也箋按鄭氏曰此州寡於山而夾川兩大流之間遭洪水其民尤困水害既除於是下丘居土以其免於厄尤喜故記之周官大司徒以土宜之法辨十有二土之名物以相民宅而知其利害注曰相視其地以奠民居使知趨利避害各得其所也當日禹作司空掌邦土居四民時地利正其事也是降丘宅土非止為下居平地故於蠶桑既興後

記之

厥土黑墳

蔡傳曰土脉墳起也

箋

按孔傳曰色黑而墳起陸氏

釋文曰馬云有肥澤也周禮草人職墳壤用麋援神
契曰黑墳宜種麥說卦傳坤於地為黑兌土乃黑而
墳也

厥草惟繇厥木惟條

蔡傳曰林氏曰兗徐揚三州最居東南下流其地卑

濕沮洳洪水為患草木不得其生至是或繇或條或
夭或喬而或漸包故於三州特言之箋按論衡曰地
性生草山性生木故草木於山為宜兗州寡於山而
夾以河濟之間水盛而草木不生今既長茂故特書
之孔傳曰繇茂條長馬云繇抽也坤文言曰天地變
化草木蕃其謂是乎

厥田惟中下厥賦貞

蔡傳曰貞正也兗賦最薄言君天下者以薄賦為正

也箋按隋書食志云采制九等而康歌興九州以土色定田皆有定賦惟冀豫梁揚錯出冀豫荆青徐雍兗揚梁為次然雍兗皆六六而無九今兗田第六賦亦第六無復下上之別故曰貞鄭氏曰貞正也其賦中上則是田正與賦相當故以為貞也周書無逸所謂惟正之供蔡傳云以薄賦為正其餘八州之賦將遂不得為正乎

作十有三載乃同

蔡傳曰堯當河下流之衝今水患雖平而卑濕沮洳
未必盡去土曠人稀生理鮮少必治作十有三載然
後賦法同於他州箋按鄭氏曰治此州正作不休十
三年乃有賦與八州同言功難也夫以為治此州者
正作不休則貞作連讀可乎且十三年中八州有賦
而堯獨無其果然乎意以作當為耕作如冀州大陸
既作之類蓋堯田第六賦亦第六必耕作十有三載
貞問其田之收穫賦之正供無復有上下豐歉之異

故曰貞也若以為同於他州則克賦第六他州亦第六乎然必十有三載者周禮天府職云季冬陳玉以貞來歲之嫩惡鄭氏曰問事之正曰貞問歲之嫩惡謂問於龜太卜職太貞之屬史記太陰在子旱明歲美至卯穰明歲衰惡至午旱明歲美至酉穰明歲衰惡故必十三載乃可以同周職方曰克州其穀宜四種

厥貢漆絲

蔡傳曰兗地宜漆宜桑故貢漆絲也箋按褚遂良曰

舜造漆器禹雕其俎是漆為當時器用之所需也貨

殖傳山東多魚鹽漆絲故兗貢之考工記慌人漚絲

以沔水漚其絲鄭氏曰沔水謂以灰所泔水也楚人

曰漚齊人曰淩

厥篚織文

漢書篚
作裴

蔡傳曰篚竹器筐屬也古者幣帛之屬則盛之以筐

篚而貢焉織文者織而有文錦綺之屬也箋按三禮

圖曰篚以竹為之長三尺廣一尺深三寸足高三寸
上有蓋孔傳曰地宜漆林又宜桑蠶織文錦綺之屬
盛之筐篚而貢焉據禮記深衣士不衣織鄭注曰織
染絲織之士衣染繒也是織文乃染絲織之而有文
非必為錦綺也詩六月織文烏章又周禮玉府掌王
之獻文織良貨賄之屬注曰文織謂織之有文出於
織成者其非為錦綺可知

浮於濟潔達于河

史記漢書
濟作沛

蔡傳曰舟行水曰浮漂者河之枝流也充之貢賦浮

濟浮漂以達於河也

箋

按水經曰濟水又東北過甲

下邑入於河酈注曰山海經濟水入鉅野注渤海入

濟琅槐東北者也又東北河水枝津注之水經以為

入河非也斯乃河水注濟非濟入河杜佑曰濟水因

王莽末渠涸不復截河過今東平濟南淄川北海界

中有水流入海謂之清河實荷澤汶水合流亦曰濟

河蓋因舊名非濟水也郭景純曰濟自滎陽至樂安

博昌入海今河竭濟水仍流不絕然河水於濟漯之
北別流注海今所輟流者惟漯水耳郭或以為濟注
之事實非也孔傳曰順流曰浮因水入水曰達

蔡傳曰地志漯水出東郡東武陽至千乘入海程氏
以為此乃漢河與漯殊異然亦不能明言漯河所在
未詳其地也箋按水經注曰桑欽地理志漯水出高
唐余按穆天子傳丁卯天子自五鹿東征釣於漯水
以祭淑人已巳天子東征食馬於漯水之上尋其沿

歷逕趣不得近出高唐也据穆傳郭注漯水今濟陰
漯陰縣是漯陰在濟水之陰也水經漯水逕高唐縣
故城東又東北逕漯陰故城北故兗州貢賦浮濟浮
漯以入河也金史志博州博平縣有漯河今在章丘
縣東北七里源出縣之長白山西北流入小清河唐
志濟南章丘縣有長白山是也薛氏謂古漯自東昌
府朝城縣受河而東入海故浮漯可以達河西漢末
河并行漯川其後河徙而漯亦不復存矣章丘縣志

縣東北七里有漂水出長山縣之長白山西北流入
小清河非古漂也

禹貢會箋卷二

欽定四庫全書

禹貢會箋卷三

翰林院檢討徐文靖撰

海岱惟青州

蔡傳曰青州之域東北至海西南距岱箋按蔡冀州

傳中引程氏日記云冀之北境則遼東西右北平是

矣於舜典傳中仍用孔氏分青州為營州之說至此

易據海為至海仍無所歸一也据爾雅九州齊曰營

州有營而無青并青於營也兩河間曰冀州燕曰幽州分幽於冀也安得以幽營皆冀地乎周禮幽州其川曰河涕而不及海河內曰冀州而不及海獨禹貢謂海岱惟青州安得謂青州直至海而不跨海乎且舜營州即遼東商改青州為營州則遼東屬青可知周時以青兼徐則青州地大故分青之遼東以屬幽孔傳曰東北據海西南距岱無可疑也歐陽志輿地廣記載禹貢九州疆域以遼東營州屬冀與蔡傳以

青東北至海皆非

蔡傳曰岱泰山也今在襲慶府奉符縣西北三十里
箋按山海經泰山泰水出於其陽漢官儀及泰山記
曰盤道屈曲而上凡五十餘盤經小天門自下至古
封禪處凡四十里郭璞注山海經曰泰山從下至頭
四十八里二百步周禮正東曰青州其山鎮曰沂山
河東曰兗州其山鎮曰岱山禹貢時青州地廣際周
職方兗界也

嶧夷既略

五帝本紀
嶧作郁

蔡傳曰嶧夷薛氏曰今登州之地畧經畧為之封畛

也即堯典之嶧夷箋按堯典宅嶧夷曰暘谷史記作

郁夷

郁音嶧

水經注胸山東北有大洲謂之郁洲山海

經曰郁山在海中者也史記索隱曰嶧夷今文尚書

及帝命驗並作禺鐵鐵古夷字据異物志夷州土無

銅鐵取磨礪青石以作弓矢有夷字又有鐵字鐵即

鐵耳元和志萊州掖縣北有渤海則已入東萊郡界

過碣石二百餘里元人又以鐵山為碣石于欽齊東
曰青州東北跨海跨小海也海限塞山有此一曲北
自平州碣石南至登州沙門島是為渤海之口胡氏
曰于氏所謂碣石蓋即鐵山也鐵山南對沙門島北
與旅順口相接正當渤海之口是古所謂碣鐵者即
此定四年傳曰封畛土略杜注曰畛塗所經也畧界
也傳又曰天子經畧諸侯正封古之制也封畧之內
無非君土是矣是既畧言正其經畧使無侵越也孔

傳用功少曰畧嶠夷近海何有事於用功之多哉

濰淄其道

漢書作惟淄
史作既道

蔡傳曰濰水地志出瑯琊郡箕縣今密州莒縣東北

濰山也北至都昌入海箋按地理志濰出琅邪箕屋

山蓋箕縣之屋山也水經注濰自箕縣北逕東武縣

西北流合扶淇之水又北右合盧水即久台水也

地志

久台水出瑯邪橫縣橫
山東南至東武入濰

尚書所謂濰淄其道矣今屋

山在莒州西北九十里濰水至膠州高密入海括地

志云密州莒縣山澠水所出是也

蔡傳曰淄水地志出泰山郡萊蕪縣原山今淄州淄

川縣東北七十里原山也東至博昌入濟又東北入

海

箋

按水經注淄水入馬車瀆亂流

漢志齊郡鉅定縣有馬車瀆

東北逕琅槐故城南又東北至皮丘坑入於海蓋漢志

但言淄水入濟蔡傳東北入海乃据酈注而補也今

淄水出原山在泰安州萊蕪縣東二十里至青州壽

光縣入濟與濟歷濱州蒲臺利津諸界入海蓋淄至

博昌入濟而東北至齊郡鉅定縣馬車瀆水以下又
濟入海之處也淄水入海之道與濟同非謂濰乃入
海淄但入濟也日記疑漢書本濟或誤非是

厥土白墳

集解曰平地之土色白而性墳箋按青土色白與冀
畧同但青土白而墳起較冀土白而柔軟微有分也
周官草人職墳壤用麋其性相似可知也

海濱廣斥

史記作
廣瀉

蔡傳曰海涯之地廣漠而斥鹵許慎曰東方謂之斥
西方謂之鹵斥鹵鹹地可煮為鹽者也箋按爾雅十
藪齊有海隅郭注曰海濱廣斥鄭氏曰斥謂地鹹鹵
夏本紀海濱廣瀉厥曰斥鹵周禮草人職鹹瀉用貍
易緯乾鑿度坤有八色東鹹西淡是也史記相如傳
除邊關關益斥張揖曰斥廣也齊世家齊自泰山屬
之瑯琊北被於海膏壤三千里是青地廣漠而斥鹵
也

厥田惟上下厥賦中上

孔傳曰田第三賦第四

箋

按周職方曰其穀宜稻麥

厥貢鹽絺

蔡傳曰鹽斥地所出

箋

按爾雅曰中有岱岳與其五

穀魚鹽生焉周禮鹽人掌鹽之政令以共百事之鹽

祭祀共其苦鹽散鹽賈疏曰散鹽煮水為之出於東

海管子曰海王之國謹正鹽筴青州近海煮海為鹽

是也若斥地雖鹹猶可耕種草人土化之法鹹潟則

用貍是也

蔡傳曰絺細葛也

箋

按周書文傳解礫石不可穀植

之葛木以為絺綌以為材用周禮掌葛有葛征以徵
絺綌之材於山農書有曰遠邇畢獻方物惟服食器
用若青州之貢鹽絺惟服食也或以絺為益稷篇絺
繡之絺淮南齊俗訓有詭文繁繡据周禮司服職云
王祭社稷五祀則希冕鄭注冕服九章皆希以為繡
釋文曰希本作絺賈氏疏曰希繡者孔君以細葛上

為繡

鄭讀希為黼黻
也謂刺繪為繡

海物惟錯

蔡傳曰錯雜也海物非一種故曰錯林氏曰既總謂之海物則固非一物矣錯蓋別為一物如錫貢磬錯之錯理或然也箋按周官太宰掌九貢九曰物貢海物惟錯若職方正東青州其利魚蒲之類是也何得以磬錯例之

岱畎絲枲

蔡傳曰畎谷也岱山之谷也泉麻也

箋

按周官太宰

九貢有嬪貢鄭注嬪貢絲枲也其屬有典絲典枲孔
傳曰畎谷也爾雅水注川曰谿注谿曰谷豈必岱山
之谷始有是貢乎觀書益稷篇濬畎澮距川梓材若
稽田為厥疆畎考工記匠人為溝洫一耦之伐深尺
廣尺為之畎鄭注曰畎畎也班固西都賦農服先疇
之畎畎趙過曰后稷始畎田畎亦何當專指畎谷也
孔傳泉麻也周禮籩人職朝事之籩其實藎黃注曰

蕢泉實儀禮有司徹麴蕢坐設於豆西注曰蕢焚泉
實也賈公彥曰案喪服傳云菹者麻之有蕢者也牡
麻者泉麻也若然蕢麻有實泉麻無實鄭云蕢為泉
實者舉其類耳其實泉是雄麻無實

鉛松怪石

蔡傳曰怪石怪異之石也林氏曰怪石之貢誠為可
疑意其必須以為器用之飾非特貢其怪異之石以
為玩好也箋按管子曰山上有綠石者下有鉛錫蘇

頌曰鉛一名黑錫周禮州人掌金玉錫石之地鄭注
錫釧也書疏曰錫所以柔金也考工記攻金之工掌
執金錫之齊故也貢松者大司徒職曰制其畿疆設
其社稷之壇而樹之各以其野之所宜木遂以名其
社鄭注所宜木謂若松栢栗也若以松為社者則名
松社之野是夏社宜松故貢松也孔傳曰怪石怪異
好石似玉者山海經苟牀之山多怪石郭注怪石似
玉書曰鉛松怪石也今萊州掖縣出五色石青州所

貢殆此類歟

萊夷作牧

史作
為牧

蔡傳曰萊夷顏師古曰萊山之夷齊有萊侯萊人即
今萊州之地作牧者言可牧放萊人以畜牧為生也

箋按水經注萊蕪禹貢所謂萊夷也余按太蕪萊柞

並山名也郡縣取目焉左傳辭以無山與之萊柞晉志
東萊黃縣有萊山是也作牧既可耕作兼可畜牧也
匪但放牧而已

厥篚麋絲

史記作
禽絲

蔡傳曰麋山桑也山桑之絲其韌中琴瑟之絃蘇氏
曰惟東萊為有此絲以之為縉其堅韌異常萊人謂
之山繭箋按爾雅麋山桑詩皇矣其麋其柘漢五行
志麋弧注麋山桑之有點文者禹貢所謂麋也爾雅
又有蠓桑繭殆所謂麋絲也蠓或謂蠓之別名王盤
農書注魯桑之類宜飼大蠓荆桑宜飼小蠓禹貢麋
絲則是以麋桑飼蠓而吐絲也山東志麋絲出棲霞

縣正禹貢萊夷之故墟也朱子曰萊夷及揚之島夷間於厥篚或時貢土物以見來王之意後人誤會其旨遂謂萊夷放牧之處有縻絲因以為貢夫九州惟梁雍有貢無篚他州皆有豈必出於夷也

浮于汶達于濟

史作通濟漢書作汴

蔡傳曰汶水出泰山郡萊蕪縣原山西南入濟在今鄆州中都縣也箋按漢地志泰山萊蕪禹貢汶水出西南入洙桑欽所言又琅琊朱虛東泰山汶水所出

東至安丘入維師古曰前言汶水出萊蕪入濟今此
又言出朱虛入維將桑欽所說有異或者有二汶水
乎曾氏曰出萊蕪縣原山入濟者徐州之汶也出朱
虛縣泰山北又東北入濰者青州之汶也然禹貢浮
汶達濟皆指青州則謂青州之汶入濰者濰乃入海
何由達河至帝都乎馬之貞曰汶水東出原山西流
過萊蕪奉高汶陽之南剛城之北又西至龍山南分
為四派其南河至陽城南梁山東匯為大澤其一過

壽良北其一經郈亭南其北曰坎河同流至壽張安
民亭與北濟合故青州貢道浮汶達濟

禹貢會箋卷三

欽定四庫全書

禹貢會箋卷四

翰林院檢討徐文靖撰

海岱及淮惟徐州

周合其地
于青州

蔡傳曰徐州之域東至海南至淮北至岱而西不言
濟者岱之陽濟東為徐岱之北濟東為青言濟不足
以辨故畧之也箋按爾雅濟東曰徐州注云自濟東
至海若言濟不足以辨此何以單言濟也故知言淮

以別於青不事并言濟也蓋海岱青徐所同淮海徐揚所同海岱及淮乃徐耳

淮沂其入

又史作治

蔡傳曰淮見導水曾氏曰淮之源出於豫之境至揚徐之間始大其泛濫為患尤在於徐故淮之治於徐言之也沂水地志出泰山郡蓋縣艾山今沂州沂水縣也南至於下邳西南而入於泗箋按金氏曰淮出今唐州桐栢山行千七百里至海州入海水經注曰

鄭氏云沂出沂山或云臨樂山水有二源南源所導
世謂之柞泉北水所發俗謂之窮魚泉俱東南合成
一川至下邳縣北西流分為二水一水於城北西南
入泗一水逕城東屈從縣南亦注泗謂之小沂水左
傳隱六年公會齊侯盟於艾杜注泰山牟縣東南有
艾山沂水所出即是山也鄭氏曰沂出沂山今青州
沂水縣山沂水出其西接臨朐縣界

蔡傳曰曾氏云徐州水以沂名者非一酈道元謂水

出尼丘山西北過魯之雩門亦謂之沂水出太公武

陽之冠石山

太公誤當是太山

亦謂之沂水而沂水之大則

出於泰山也

箋

按昭二十五年左傳平子請待於沂

上杜氏曰魯城南自有沂水此小沂也地理志沂水

出泰山蓋縣臨樂子山南至下邳入泗過郡五行六

百里此大沂水也郡國志琅邪臨沂縣有洛水注之

水出太山南武陽之冠石山是出冠石者洛水非沂

水也世以其注沂亦或謂之小沂水是徐州之水以

沂名者非一也唐孔氏曰又訓治也淮出桐栢山發源遠矣於此州言之者淮水至此而大為害尤甚喜得其治故於此記之

蔡傳曰徐之水有泗有汶有汴有潞而獨以淮沂言者徐之川莫大於淮淮又則自泗而下凡為川者可知矣徐之浸莫大於沂沂又則自沫而下凡為浸者可知矣箋按日記曰汴水出滎陽縣大周山合京索須鄭四水東南至中牟縣北入於黃河泗水出泗水

縣陪尾山其水四源並發循城北八里始合為一西
流至曲阜經嶷陽城東五里與沂水合瀛水在滕縣
東北七十里出東海合鄉西南經魯國至高平湖陸
縣入泗沭水源出沂山自莒州西北流入州境會諸
澗水南經馬陵山入郟城縣注於淮泗徐士彰曰日
記所錄乃兗州之泉而非徐州之水其所謂泗則今
泗水縣之泗而非泗州之泗也然地志謂東莞術水
即沭水也至下邳入泗郭璞謂泗水至下相入淮水經謂

潯水至湖陸縣入泗獲水出汴水至彭城縣北東入
泗東莞今青州臨朐下邳今邳州下相今宿遷湖陸
故城今徐州沛縣烏在盡為兗州之水而非徐州之
水也

蒙羽其藝

蔡傳曰蒙山地志在泰山郡蒙陰縣西南今沂州費
縣也羽山地志在東海郡祝其縣南今海州朐山縣
也藝者言可種藝也箋按哀十七年公會齊侯盟於

蒙杜預曰蒙在東莞蒙陰縣西今蒙山在蒙陰縣南
四十里其陽為費縣陰為蒙陰縣也連山易曰有崇
伯繇伏於羽山之野寰宇記曰羽山俗呼懲父山漢
志在祝其唐武德八年省祝其入懷仁金大定七年
改懷仁縣為贛榆今屬淮安府海州其藝孔傳曰二
山已可種藝正義曰詩云藝之荏菹故藝為種也

大野既豬

史記豬
作都

蔡傳曰大野澤名地志在山陽郡鉅野縣北今濟州

鉅野縣也鉅即大也水蓄而復流者謂之豬箋按左
傳哀十七年西狩於大野杜預曰鉅野縣東北大澤
是也鉅野界徐之西兗之東南北三百里東西百餘
里故周禮職方兗州澤藪曰大野王順渠曰南旺湖
在汶上縣西南縈洄計百十餘里而會通漕河貫乎
其中湖界為二西湖廣衍倍於東湖是南旺即古大
野無疑一統志湖在汶上縣西南二十里

蔡傳曰何承天曰鉅野廣大南導洙泗北連清濟徐

之有濟於是乎見又鄆州中都西南亦有大野陂

中都

今東平州汶上縣

或皆古大野之地也

箋

按春秋莊公十八

年夏公追戎於濟西左傳僖三十一年分曹地東傳於濟則徐之有濟可知孔傳水所停曰豬馬云水所停止深者曰豬

東原底平

蔡傳曰東原在徐之西北而謂之東者以在濟東故也東平國在景帝亦謂濟東國云益知大野東原所

以志濟也

箋

按漢宣帝甘露二年為東平國景帝中

六年濟東國也水經濟水故瀆又北右合洪水酈注

曰上承鉅野薛訓渚厯澤西北渚又北逕闕鄉城西

郡國志東平陸有闕亭又北濟瀆合自渚迄於北口

一百二十里名曰洪水故張華博物志曰兗州東平

郡即尚書之東原也

今東平州也

孔傳曰致功而地平言

可耕也

厥土赤埴墳

蔡傳曰土黏曰埴埴膩也周有搏埴之工老氏言埴埴以為器惟土性黏膩細密故可搏可埴也箋按周禮草人職赤緹用羊埴壚用豕考工記用土為瓦謂之搏埴之工注曰埴土黏也

草木漸包

蔡傳曰漸進長也如易所謂木漸包叢生也如詩所云如竹包矣言其叢生而積也箋按周禮閭師任圃以樹事貢草木草木之貢虞夏已有故禹貢特記其

漸包也孔傳漸進長包叢生如易象曰漸進也說卦傳曰巽為木為長為高是也又按木漸蔡傳曰如易所謂木漸象曰山上有木漸漸自為句今讀為木漸可乎爾雅包稹孫炎曰物叢生曰苞齊人名曰稹蔡傳叢生而積積當是稹之譌

厥田惟上中厥賦中中

孔傳曰田第二賦第五箋按周職方青州其川淮泗其浸沂沭其穀宜稻麥即禹貢之徐州也周分禹青

州東北為幽并禹徐州於青也

厥貢惟土五色

蔡傳曰徐州之土雖赤而五色之土亦間有之故制
以為貢周書作雒曰諸侯受命於周乃建大社於國
中其壝東青土南赤土西白土北驪土中央疊以黃
土將建諸侯鑿取其方面之土

周書方下
有一字

包以黃土

苴以白茅以為土封

周書曰以土封
之謂之製土

故曰受削土於

周室此貢土五色意亦為是用也

箋

按太康地記曰

城陽姑幕有五色土封諸侯錫之茅土用為社禹時
徐州所貢當即是土也京相璠曰琅邪郡姑幕縣南
四十里負亭故魯鄆邑今莒州有姑幕城是也又按
周書作雒解受則土於周室則法也蔡傳云削土誤
羽畎夏翟

蔡傳曰羽畎羽山之谷也夏翟雉具五色染人之職
秋染夏鄭氏曰染夏者染五色也曾氏曰山雉具五
色出於羽山之畎則其名山以羽者以此歟箋按孔

傳曰翟雉名羽中旌旄羽山之谷有之今淮安府贛榆縣山也西界鳳陽府虹縣即漢夏丘縣北齊夏丘郡輿地志堯封禹為夏伯邑於此即位徙陽翟周禮內司服掌王后之六服有揄狄闕狄鄭氏曰狄當為翟翟雉名江淮而南青質五色皆備曰揄是羽畎正夏后受封之地也夏邑在江淮間產此雉故曰夏翟天官夏采注徐州貢夏翟之羽有虞氏以為綏後世或無故染烏羽象而用之春官服車五乘孤乘夏篆

卿秉夏縵皆畫五采以為夏注讀夏為假非也染人
染夏即以翟產於夏邑名之非以夏為染采之名也
鄭氏曰染五采謂之夏者其色以夏翟為飾染者擬
以為深淺之度是以放而名焉則得之矣

嶧陽孤桐

蔡傳曰地志東海郡下邳縣有葛嶧山古文以為嶧
山今淮陽軍下邳縣也陽者山南也孤桐特生之桐
其材中琴瑟箋按詩魯頌保有鳧繹遂荒徐宅毛傳

曰鳧山也繹山也禹貢嶧陽孤桐孔傳曰孤特也郡國志下邳葛嶧山出名桐一統志山在今邳州城西北六里詩椅桐梓漆爰伐琴瑟陸璣疏桐有青桐赤桐白桐白桐宜琴瑟孤桐殆如龍門之桐百尺無枝者故曰孤桐若以為特生之桐所生無幾焉可定為常貢乎泗濱浮磬

蔡傳曰泗水名出魯國卞縣桃墟西北陪尾山西南過彭城又東南過下邳入淮卞縣今襲慶府泗水縣

也濱水旁也

箋

按水經注泗水逕下邳縣故城西東

南流又東南逕淮陽城北臨泗水又東南逕魏陽城北城枕泗州又東逕角城北而東南流注於淮胡三省曰角城在淮水之陽梁後於角城置淮陽郡謂之

泗口

泗口在今宿遷縣界

蔡傳曰浮磬石露水濱若浮於水然或曰非也泗濱非必水中泗水之旁近浮者石浮生土中不根著者也今下邳有石磬山或以為古取磬之地

箋

按左傳

隱八年公及莒人盟於浮來杜預曰浮來紀邑東莞
縣北有邳鄉邳鄉西有公來山號曰邳來間後漢郡
國志琅邪東莞有邳鄉有公來山或曰古浮來元和
郡縣志下邳縣有沂水水經注沂水又東逕浮來之
山在邳鄉西故號曰邳來之間也浮來之水注之是
古者讀邳為浮浮磬即邳磬矣蓋當時泗水之濱有
浮來之山產此磬石故曰浮磬胡三省注通鑑曰濠
州東九十里有浮山山下有穴名浮山洞

九域志泗
州西至濠

州一百七
十五里

水經淮水自鍾離縣又東逕浮山今泗州

盱眙亦有浮山若以浮生土中為浮磬則浮山亦可
謂浮生者乎明堂位叔之離磬世本無句作磬皇氏
曰無句叔之別名

淮夷蠙珠暨魚

史記作
泉魚

蔡傳曰淮夷淮之夷也

箋

按孔傳曰淮夷二水王肅

亦以淮夷為水名鄭氏曰淮夷淮水之夷民也後漢
東夷傳武乙衰敝東夷寢盛遂分遷淮岱為淮夷所

由始今禹貢徐州已有淮夷則淮之有夷久矣魯頌
憬彼淮夷來獻其琛毛傳曰淮夷東國在淮浦而夷
行也徐州之稱淮夷者殆以此耳詩記曰徐州在淮
北徐州有淮夷夷之在北者也詩有曰率彼淮浦省
此徐土是淮北之夷也若在淮南則徐土非聯接之
地矣

蔡傳曰蠙蚌之別名也暨及也珠為服飾魚用祭祀
今濠泗楚皆貢淮白魚亦古之遺制歟箋按周官太

宰九貢有游貢鄭曰游貢燕好珠璣也又有物貢鄭
曰雜物魚鹽也賈疏曰珠即蠙珠魚即暨魚徐州所
貢詩傳曰佩玉上有蔥衡下有雙璜衡牙蠙珠以納
其間賈公彥曰蠙蚌也珠出於蚌故言蠙珠鹽鐵論
綴以朱蠙是蠙珠並為服飾也蠙說文作班云夏書
從賓從虫蠙亦作班宋弘曰淮水出班珠珠之有聲
者也夏小正二月祭鮪傳曰鮪也者魚之先至者也
月令季冬始漁乃嘗魚先薦寢廟周禮甸人職凡祭

祀賓客共其魚之鱸鼈故貢魚也後周太祖本紀曰其沿淮州郡淮白魚今後不須進奉是淮白魚之不貢久矣宋志楚州貢苧布泗州貢絹濠州貢糟魚蔡傳以為今濠泗楚皆貢淮白魚不知何据

厥篚玄織縞

蔡傳曰玄赤黑色幣也織縞皆縵也禮曰素縞麻衣禪而織記曰縞衣而養老則知織縞皆縵之名也曾氏曰白經赤緯曰縞黑經白緯曰織織也縞也皆去

山即吉之服也箋按孔氏曰玄黑繒縞白繒織細也
蔡傳以玄為赤黑幣而不以玄為色者書有曰篚厥
玄黃玄用篚則直以為幣焉可也然玄纁璣組何嘗
不以玄為色也禮雜記曰委武玄縞而后黻鄭注委
武冠卷也玄玄冠也縞縞冠也小爾雅繒之精者曰
縞詩毛傳縞薄繒不染故色白是玄與織縞為二色
也郝氏曰最細曰織粗白曰縞蓋玄白二色而織縞
二種祥而縞禪而織雖據檀弓以為說然當時制為

貢篚豈必以去凶即吉之服為常篚乎

浮于淮泗達于河

河說文作荷

蔡傳曰汧水受陳留浚儀陰溝至蒙為澠水東入於泗則淮泗之達河者以澠至於泗也慎又曰泗受洙水東入淮蓋泗水至大野而合洙然則泗之上源自洙亦可以通河也箋按說文作達於荷水經荷水又東過胡陸縣南東入於泗水注曰澤水所鍾也尚書浮於淮泗達於河是也日記曰淮入海泗入淮淮泗

不與河通由泗而遡灘即汴水也由灘而達河此一道也

由灘達河由泗之上源以遡汴由汴而達河此又一

道也由汴達河是西路是皆逆流而上者也張洎曰禹於滎

澤下分大河為陰溝引注東南以通淮泗至大梁浚

儀縣西北復分為二渠漢明帝時王景始作浚儀一渠循河溝故瀆故縣氏之一

渠元經陽武中牟臺下為官渡水官渡在今中牟縣曹操與袁紹相持

於官渡口即此一渠始皇疏鑿以灌魏郡謂之鴻溝通考曰

世言煬帝開汴渠以幸揚州隋大業三年詔發河南男女萬丁開汴水起滎

澤入汴
千餘里

考禹貢言堯都冀州居河下流而入都貢賦

重於用民力故每州必記入河之水獨淮與河無相通之道求之故迹而不得乃疑汴渠自禹以來有之

不起於隋世既久遠或名鴻溝或名汴渠

鴻溝在今
鄭州滎陽

縣大概皆自河入淮故淮河引江湖之舟以達於冀

也今據後漢書則平帝時已有汴渠曰河汴決壞則謂輸受之所也官渡直黃河也故袁曹相距沮授曰悠悠黃河吾其濟乎汴渠自禹來有之此不易之論

也又國策蘇子說魏王曰大王之地東有鴻溝陳汝
南則鴻溝之名亦不自秦始也

禹貢會箋卷四

欽定四庫全書

禹貢會箋卷五

翰林院檢討徐文靖撰

淮海惟揚州

蔡傳曰揚州之域北至淮東南至於海箋按釋名曰

淮圍也圍繞揚州北界東至海也孔傳但云北據淮

南距海蔡傳以東南至海為是杜佑曰自晉以下歷

代皆云五嶺之南至於海並禹貢揚州之地按荊州

南境至衡山之陽若五嶺之南在九州封域則以隣
接壤宜屬荊州豈有舍荊而屬揚又熊氏曰禹嘗至
會稽並越地屬揚州亦甚矣若會稽東南郡縣及粵
東八閩唐虞時聲教未通貢賦不及此皆秦漢後開
闢之地烏可以揚州概之今按堯典宅南交山海經
甌閩皆在海中桂林八樹在番禺東則南粵交廣禹
時已通聲教者可知國策吳起為楚悼南攻揚越史
南越尉佗傳秦時已併天下畧定揚越張晏曰揚越

揚州之南越也正義曰夏禹九州本屬揚州故曰揚
越觀禹貢揚州貢賦沿於江海而荊州但云江沱潛
漢其封域不及海可知矣

彭蠡既豬

蔡傳曰彭蠡地志在豫章郡彭澤縣東合江西江東
諸水跨豫章饒州南康軍三州之地

三州虔州洪州饒州也

所

謂鄱陽湖者是也

箋

按地理志豫章彭澤縣彭蠡澤

在西郡國志彭蠡湖周四百五十里荊州記曰宮亭

即彭蠡澤也謂之彭澤湖一名滙澤張勃吳錄曰彭

蠡今名洞庭湖案在今九江郡界正義曰彭蠡是江

漢合處元和志曰揚瀾湖一曰左里

今都昌縣西南
九十里
有左里

城

彭蠡又呼為左蠡是皆湖之異名也史記秦伐楚

取番置番陽縣以在鄱水之陽也隋始以鄱陽名湖

金仁山曰彭蠡今鄱陽湖自洪宮亭受江西嶺北江

東諸水在江饒南康興國之間至池州湖口入江漢

志所謂湖漢九水者是也

陽鳥攸居

蔡傳曰陽鳥隨陽之鳥謂鴈也今惟彭蠡洲渚之間
千百為羣記陽鳥所居猶夏小正記鴈北鄉也

箋按

孔傳曰冬月所居於此澤正義曰日之行也夏至漸
南冬至漸北鴻鴈之屬九月而南正月而北左思蜀
都賦所云木落南翔冰泮北徂是也日陽也此鳥南
北與日進退故曰陽鳥夏小正曰正月鴈北鄉戴傳
曰鄉者何也鄉其居也鴈以北方為居何以謂之居

生且長焉耳九月遷鴻鴈何不謂南鄉也曰非其居也今禹貢彭蠡攸居則又實指南鄉而言蓋是時水土既平洲渚之間羣相聚處晞陽自得一若其生且長於是焉故謂之攸居也

三江既入

蔡傳曰庾仲初吳都賦註松江下七十里分流東北入海者為婁江東南流者為東江併松江為三江其地今亦名三江口吳越春秋所謂范蠡乘舟出三江

之口者是也

箋

按地理志南江從會稽吳縣南東入

海

今蘇州吳縣

中江從丹陽蕪湖縣

今屬太平府

東北至會稽

陽羨東入海

今常州府宜興縣

北江從會稽毗陵北東入海

今常州府江陰縣

故導水東為北江東為中江孔傳曰有北

有中南可知也蓋三江既入入海之道有三非謂入

震澤也蔡傳以松江婁江東江當之周公環曰宋三

江口江面濶九里地勢低於震澤三丈蘇子瞻曰三

吳之水瀦為太湖湖之水溢為松江以入海然則三

江皆震澤之委又近在數十里內合為一江以入海
無所謂三江既入者也安得據以為禹貢三江

蔡傳曰蘇氏謂岷山之江為中江岷冢之江為北江
豫章之江為南江似可依據然江漢會於漢陽合流
數百里至湖口而後與豫章江會又合流千餘里而
後入海不可復指為三矣義按國語子胥曰吳之與
越三江環之民無所移固非一吳縣南之三江遂可
以環吳越矣周職方揚州其澤藪曰具區其川三江

其浸五湖吳地記云五湖太湖東岸五灣也然職方
輟具區注云即震澤安得又以太湖為浸而兩記之
也吳越春秋曰范蠡既滅吳乃乘扁舟出三江入五
湖若震澤即五湖三江即震澤之委何言出三江又
何言去吳而辭越也應劭曰范蠡出三江入五湖今
廬江臨丹陽蕪湖縣是也據漢志以禹貢中江在蕪
湖則廬江即為三江之一從可知矣蘇氏謂漢水自
北而來至大別入江是為北江然江漢並為大川不

應沒漢之名改為北江也竊意山海經曰廬江出三
天子都入江彭澤西郭璞注曰江出岷山東南至廬
江南界今廬江正在江北彭澤正在江南而大江行
乎其中合為三江自尋陽而東直趨於海其東北至
常州宜興入海者是為中江又一股至松江江陰入
海者是為北江吳縣南東入海者為南江入海之道
有三也漢志廬江出陵陽東南北入江則入江為北
江何疑也

蘇傳曰蘇氏知其說不通遂有味別之說禹之治水
本為民去害豈如陸羽輩辨味烹茶為口腹計耶箋
按易緯河圖曰九州殊題水泉剛柔各異青徐泉酸
以鹹荆揚泉酸以苦梁州泉苦以辛兗豫泉甘以苦
雍冀泉辛以鹹唐書許敬宗傳古者五行皆有官水
官不失職則能辨味與色潛而出合而更分皆能識
之豈謂如陸羽輩為口腹計耶

震澤底定

蔡傳曰震澤太湖也地志在吳縣西南五十里今蘇州吳縣也曾氏曰震如三川震之震若今湖翻是也具區之水多震而難定故謂之震澤底定者言底於定而不震動也箋按郡國志吳郡吳縣震澤在西劉昭注曰越絕書云湖周三萬六千頃又有大雷山小雷山山海經曰雷澤有雷神鼓其腹在吳西楊脩五湖賦曰頭首無錫足蹄松江負烏程於背上懷大吳以當胸峩峩崔嵬穹窿紆曲大雷小雷湍波相逐皆

以雷澤為震澤易曰震為雷故名湖為震也若三川
震記異也豈可以震澤例之端臨馬氏曰太湖跨蘇
湖常三境宣歙以東富陽以北水俱從荆溪之百瀆
長興之二十四瀆湖州之三十六瀆吳江之七十二
瀆吐納焉

揚州記太湖一名震澤
一名笠澤一名洞庭

此底定所以難也

故經言震澤底定以見揚功之告成豈從前震蕩難
定至是乃底於定哉

篠蕩既敷

蔡傳曰篠箭竹蕩大竹郭璞曰竹濶節曰蕩敷布也
箋按爾雅東南之美會稽之竹箭在禹跡為揚州故
特記篠蕩也爾雅疏云李巡曰竹節相去一丈曰蕩
孫炎曰竹濶節者曰蕩竹紀曰小篠大蕩竹之通稱
朱子曰蕩小節竹也不知何据敷布也孔傳曰水去
布生如易說卦傳震為萁為蒼筤竹萁亦敷也氣盛
而敷布森列

厥草惟夭厥木惟喬

蔡傳曰少長曰夭喬高也箋按孔傳少長曰夭喬高也正義曰詩云桃之夭夭南有喬木是也周書大聚解旦聞禹之禁春三月山林不登斧以成草木之長此夭喬所由來也

厥土惟塗泥

蔡傳曰塗泥水泉濕也下地多水其土淖箋按孔傳地泉濕蔡傳易地為水水與泉豈有二乎又按夏小正曰滌凍塗戴傳曰凍塗者凍下而澤上多也尸子

曰行塗以楸史記曰泥行乘橈荆揚塗泥禹施功為尤多矣

厥田惟下下厥賦下上上錯

孔傳曰田第九賦第七雜出第六

箋

按周職方曰揚

州穀宜稻援神契曰沭泉宜種稻金氏曰古人尚黍

稷田雜五種

黍稷麥菽稻

故雖旱潦而各有所收塗泥之

土其田獨宜稻不利他種故第為最下下上上錯者

錯在下上之上

厥貢惟金三品

蔡傳曰三品金銀銅也

箋

按周職方揚州其利金錫

考工記曰吳粵之金錫越世家注曰賈逵說云虞夏商周金幣三等或赤或白或黃黃為上幣銅錢為下幣釋器云黃金謂之灋白金謂之銀三品之來古已然矣

瑤琨篠簜

馬融本琨作瑣韋昭音貫

蔡傳曰瑤琨玉石名詩曰何以舟之惟玉及瑤琨說

文石之美似玉者取之可以為禮器篠之材中於矢
之筈蕩之材中於樂之管蕩亦可為符節周官掌節
有英蕩箋按周禮內宰職大祭祀則贊瑤爵鄭注曰
其爵以瑤為飾說文琨石似玉者山海經曰會稽之
山多金玉下多砮石殆琨之類也經又曰竹山多竹
箭郭璞曰箭篠也是篠中矢筈也儀禮大射禮蕩在
建鼓之間鄭注曰蕩竹也謂笙簫之屬又乃管新宮
注曰管謂吹蕩以播新宮之樂是蕩中樂之管也周

官掌節凡邦國之使節皆金也以英蕩輔之鄭注曰
英飾也蕩竹也以竹為函加以畫飾而盛其節也干
寶曰英刻書蕩竹箭也刻而書其所使之事以助三
節之信未有以英蕩為符節者惟朱子曰古人符節
多以玉為之又有竹符又有英蕩符蕩小節竹使者
謂之蕩節也蔡傳蕩可為符節本此

齒革羽毛惟木

史記無惟
木二字

蔡傳曰象有齒犀兕有革鳥有羽獸有毛木梗梓豫

章之屬箋按孔傳曰齒象牙革犀皮羽鳥羽旄牛尾据周禮掌皮冬斂革共其毳毛為氈以待邦事司服掌王之衣服祀四望山川則毳冕鄭氏曰毳罽衣服也正義曰爾雅云毛毳謂之罽則續毛為之若今之毛布是也當是時洪水泛濫草木暢茂鳥獸蹄迹之迹交錯於原野聖人因制為齒革羽毛之貢若周官冥氏攻猛獸則獻其皮革齒須翼氏攻猛鳥以時獻其羽翮使自為驅除而不之覺角人掌以時徵齒角

於山澤之農羽人掌以時徵羽翮之政于山澤之農
皆祖述禹貢之遺制也至於惟木之貢不言何木者
殆即為厥木惟喬者也前此巢居穴處至是易之以
宮室上棟下宇蓋取諸大壯則需於喬木者殊廣也
若必為榱桷豫章之屬何荊州言柰榦栝栢而此但
言惟木也周禮太宰九貢五曰材貢木材材也是矣

島夷卉服

蔡傳曰島夷東南海島之夷卉草也葛越木棉之屬

箋按史記注海州東海縣有島山去岸八十里括地志百濟國西南海中有大島十五所皆置邑有人居島夷之屬大率類此卉服孔傳曰草服葛越後漢書世祖勅會稽獻越布文選孫楚書葛越布於朔土注葛即葛藟越即蕉苧黃草之屬蔡傳以為木棉之屬非

厥篚織貝

蔡傳曰織貝錦名織為貝文詩曰貝錦是也今南夷

木棉之精好者亦謂之吉貝海島之夷以卉服來貢而織貝之精者則入篚焉箋按初學記堯懸貝於樞宮則大貝亦當時所重或然也朱仲相貝經有黃貝紫貝餘泉餘蚶黃白文之異當時島夷布帛織為黃白青黑之貝文因曰織貝傳以木棉之精好者亦謂之吉貝據宋書蠻夷傳云悉蘭池國產吉貝布闍婆國獻吉貝織雜色等布呵羅單國遣使致天竺白疊古貝葉波國古貝等物古貝即吉貝也李東璧曰古

貝是木棉自劉宋始入中國禹時安得有之又小雅
巷伯萋兮斐兮成是貝錦錦亦謂貝之文耳傳以織
貝為錦名亦非

厥包橘柚錫貢

蔡傳曰包裹也小曰橘大曰柚錫者必待錫命而後
貢非歲貢之常也箋按周官太宰九貢有物貢鄭注
曰物貢雜物魚鹽橘柚也呂氏春秋曰果之美者江
南之橘雲夢之柚崔寔政論曰橘柚之實堯舜所不

常御故禹貢亦錫命而後貢考工記橘踰淮而北為枳故淮海貢之王肅曰錫其命而後貢之不常入


汭于江海達于淮泗

史記汭作均達作通

蔡傳曰順流而下曰汭汭江入海自海而入淮泗不言達於河者因於徐也禹時江淮未通故汭於海至吳始開邦溝隋人廣之而江淮舟船始通也孟子言排淮泗而注之江記者之誤也箋按孔傳曰汭江入海自海入淮自淮入泗正義曰文十年左傳汭漢沂江

沂是逆沔是順沔江入海順也自海入淮自淮入泗
逆也水經注曰昔吳將伐齊北霸中國自廣陵城東
南築邳城城下掘深溝謂之邳江亦曰韓溟溝左傳
哀五年吳城邳溝通江淮杜預曰于邳江築城穿溝
東北通射陽湖西至末口入淮今末口在淮安府北
五里哀十三年會晉侯及吳子於黃池吳語曰夫差
起師北征闕為溝於商魯之間北屬之沂西屬之濟
以會晉公午於黃池是吳之通水有二不獨江淮之

始通已也隋大業三年詔發淮南兵夫十餘萬開邗
溝自山陽淮至於揚子江三百餘里水面濶四十步
傳謂隋人廣之者也



禹貢會箋卷五

欽定四庫全書

經部

禹貢會箋卷十六

十

詳校官監察御史_臣王爾烈

通政使司副使_臣莫瞻菴覆勘

總校官庶吉士_臣倉聖脉

校對官中書_臣王家賓

謄錄監生_臣章玉植

欽定四庫全書

禹貢會箋卷六

翰林院檢討徐文靖撰

荆及衡陽惟荊州

蔡傳曰北距南條荊山南盡衡山之陽箋按山海經

荊山之首曰景山東北百里曰荊山荊州記曰臨沮

縣西北三十里有清谿谿北即荊山卞和抱璞之處

釋名荊州取唐地志襄州南漳縣本荊山縣有荊山

荊山之名

荆山之南為荊州北為豫州是荊州亦在荆山之陽
故曰荆及衡陽今荆山在襄陽府南漳縣西北八十
里張揖廣雅曰衡山南岳有岨嶠峰上有神禹碑周
職方正南曰荊州其山鎮曰衡山寰宇記曰星當翼
軫度應璣衡故曰衡山今衡山在衡州府衡山縣西
三十里

江漢朝宗于海

蔡傳曰江漢合流于荆去海尚遠然水道已安而無

有壅塞橫決之患雖未至海而其勢奔趨于海猶諸侯之朝宗于王也箋按周職方荊州其川曰江漢楚昭王曰望不過江漢以漢至大別入江故統言江漢也江漢為四瀆之二禮曰四瀆視諸侯老子曰滄海所以能為百谷王者以其下之水之赴海猶諸侯朝王假人事以言之也孔傳曰百川以海為宗宗尊也詩沔彼流水朝宗于海意亦本禹貢也

九江孔殷

孔殷史記作甚中

蔡傳曰九江即今之洞庭也水經言九江在長沙下
雋西北楚地記巴陵瀟湘之淵在九江之間今岳州
巴陵縣即漢之下雋洞庭正在其西北則洞庭之為
九江審矣箋按山海經沅水入下雋西合洞庭中又
洞庭之山帝之二女居之是在九江之間蔡以九江
為洞庭本此果如是則禹貢荊州當先九江孔殷而
後江漢朝宗矣况山海經臣秀校即劉歆也太康地
記曰九江劉歆以為湖漢九江入彭蠡澤也歆豈不

知山海經有洞庭之山是在九江之間洞庭在九江之間不得以洞庭為九江可知矣范致明岳陽風土記曰按澧鼎沅湘合諸蠻黔南之水匯為洞庭至巴陵與荆江合而東川據其上水經云江水右會水青口資水也世謂之益陽江右則沅水注之謂之橫房口東到微湖世謂之靡湖西流注為江謂之靡湖口左則澧水謂之武陵江凡此五水注為洞庭北會為大江名曰五渚戰國策曰秦與荆戰大破之取洞庭

五渚楚辭帝子降兮北渚皆其地也是洞庭在戰國
尚謂之五渚豈禹時已謂之九江乎若使洞庭即九
江何又曰東陵地在廬江蘭陵西北敷淺原地在豫
章歷陵西是明知其為水經之誤且下雋西北安知
其非東北之謠乎

蔡傳曰今沅水漸水元水辰水叙水酉水澧水資水
湘水皆合於洞庭意以是名九江也箋按元水無考
元水疑無水之謠周易無咎作无或以此誤也經言

東至于澧過九江澧不當在九江之列史記六國表
秦始皇分天下為三十六郡析楚郡為九江鄣會稽
三郡九江名郡始此水經秦九江治壽春兼以廬江
豫章之地漢志豫章雩都縣湖漢水東至彭澤入江
行千九百八十里鄱陽鄱水西入湖漢餘干餘水東
北至鄢陽入湖漢艾縣脩水東北至彭澤入湖漢新
淦淦水西入湖漢南城盱水西北至南昌入湖漢建
成蜀水東至南昌入湖漢宜春南水東至新淦入湖

漢南楚彭水東入湖漢以是為九江正在於江漢朝
宗之下與經文合無疑也

蔡傳曰漢志九江在廬江郡尋陽縣尋陽記

張僧鑒撰

九

江之名有烏江蚌江烏白江嘉靡江畎江沙江廩江
隄江筭江今詳漢九江郡之尋陽乃禹貢揚州之境
而唐孔氏又以為九江之名起於近代未足為據

箋

按沈約宋書云尋陽漢屬廬江吳立蘄春郡尋陽屬
馬水經江水又東過蘄春縣南此即西陽尋陽二郡

界是也

漢西陽屬江夏郡西陽故城在今黃州府黃岡縣

史記淮南王傳伍

被曰南收衡山以擊廬江有尋陽之船守下雒之城

結九江之浦絕豫章之口正義曰即彭蠡湖口北流

出大江者應劭注地理志曰江自尋陽分為九道郭

璞江賦曰源二分於岨崧流九派乎尋陽湖漢九水

北至彭澤入江聿有明徵而乃據尋陽記之臆造真

屬無稽之言也既明知起於近代又何引以為据

蔡傳曰九江派別取之耶亦必首尾短長大略均布

然後可目之為九然其一水之間當有一洲九江之
間沙水相間乃為十有七道尋陽之地將無所容設
使派別為九則當曰九江孔道不當曰孔殷於導江
當曰播九江不應曰過九江孔甚也殷正也九江水
道甚得其正也箋按太史公自序闕九疑浮于沅湘
乃曰余南登廬山觀禹疏九江則不以洞庭為九江
也竹書紀年曰周康王十六年南巡狩至九江廬山
穆王二十七年大起九師東至于九江遂伐越是九

江與廬山為近也洞庭在鎬京西南若使洞庭為九江又何當言東至也漢志九江在尋陽南豈謂止在尋陽一縣耶通典曰舒州宿松縣有江水自鄂陵分為九派會於此縣界洲上二百餘里合流謂之九江口東得武林洲即桑落洲之下尾

鄂在武昌桑落洲在安慶府宿松縣

宋史林栗傳江州上至鄂渚七百里下至池陽五百里九江沙水相間蔡傳疑尋陽之地將無所容何耶至以派別為九導江當曰播九江不應曰過九江不

知此過九江者乃江水過之猶漢水過三澨也若江水不過九江何由朝宗于海耶孔殷史記作甚中孔傳九江在尋陽甚得地勢之中是也蔡云殷正也九江水道甚得其正也向使殷當訓正堯典以殷仲春以殷仲秋何必別之曰以正仲夏以正仲冬也由此推之殷與正宜不同也

沱潛既道

史記作沱
潛已道

蔡傳曰爾雅水自江出為沱自漢出為潛此則荊州

江漢之出者也今按南郡枝江縣有沱水然其流入江而非出于江也華容縣有夏水首出于江尾入于沔亦謂之沱潛水則未有見箋按孔傳曰沱潛發源梁州入荊州漢志南郡枝江縣有江沱出西東入江湖身之注通鑑曰枝江縣自漢以來屬南郡江水自縣西別出為沱而東復合于江故曰枝江則是出江而又入江也王氏炎曰沱水在江陵府枝江縣土人謂枝江為百里洲其與江分處謂之上沱與江合處

謂之下沱蔡傳謂非出江者誤矣漢志武都東漢水

受氐道水一名沔

武都令犂昌府隋州也

過江夏謂之夏水入

江應劭曰沔水入江別至南郡華容為夏水過郡入

江故曰江夏則是漢水入江而又出江者也蔡傳依

鄭氏以為沱水非矣王氏炎曰隋志南郡松滋縣有

涔水今松滋分為潛江矣承天府志

今安陸府

漢水自鍾

祥縣北分為蘆汊湖經潛江東南復入漢此為古潛

水甚明徐退山曰沱水自江出潛水自漢出二水合

為一流以出瞿塘至荆猶存舊名者所以紀江漢之
源委也

雲土夢作乂

史記雲夢
土為治

蔡傳曰雲夢澤名周官職方荊州其澤藪曰雲夢方
八九百里跨江南北華容枝江江夏皆其地也左傳
楚子濟江入于雲中又楚子以鄭伯田于江南之夢
合而言之則為一別而言之則為二也箋按沈括筆
談曰禹貢雲夢土作乂太宗皇帝得古本尚書作雲

土夢作又詔改禹貢從古本左傳昭三年鄭伯如楚
既享子產備田具王以田江南之夢以者謂以田具
耳豈謂以鄭伯乎爾雅楚有雲夢邢昺疏引杜預曰
南郡枝江有雲夢城江夏安陸縣亦有夢城或曰華
容縣東南有巴丘湖江南之夢也相如子虛賦雲夢
者方八九百里亦得單稱雲單稱夢也

蔡傳曰雲土者雲之地土見而已夢作又者夢之地
已可耕治也蓋雲夢之澤地勢有高卑故水落有先

後人工有早晚也後按大雅綿之詩自土漆沮齊詩

作自杜言公劉避狄而來居杜漆沮之地是雲土即

雲杜史記索隱曰雲土夢本二澤名韋昭曰雲土今

為縣水經曰沔水逕江夏雲杜縣東今安陸府京山縣夏水

從西來注之道元曰即堵口也禹貢所謂雲土夢作

又故縣取名焉雲土地可為縣不卑于夢傳謂雲但

土見而以作又專屬夢非也若以洪水方割土見必

記九州之大其可勝記哉

厥土惟塗泥

蔡傳曰荊州之土與揚州同

箋

按素問注曰中原地

形西北高東南下故荊揚土多泥塗馬融曰泥塗漸
洳也蓋荊揚澤國農夫多需體塗足詩如塗塗附是
則塗泥之謂也

厥田惟下中厥賦上下

孔傳曰田第八賦第三

箋

按周職方曰荊州土宜稻

與揚同但荊地廣沃一歲再穫故菽粟饒足田比揚

只加一等賦乃第三等也

厥貢羽毛齒革惟金三品

蔡傳曰荆之貢與揚大抵多同然經先言羽毛者漢

孔氏

此見唐孔氏書疏云漢孔氏誤

所謂善者為先也

箋

按夏小正

十有一月王狩陳筋革戴傳曰陳筋革者省兵也明

堂位曰夏后氏之綏鄭氏曰綏當為綏綏為注旄牛

尾于干首所為大麾賈疏曰案鍾氏染鳥羽為王后

之車飾亦為旌旗之綏是羽毛皆當時所需可知也

伊尹四方獻令曰正南以珠璣象齒文犀翠羽為獻
周職方曰正南曰荊州左傳僖二十三年重耳對楚
子曰羽毛齒革則君地生焉楚語王孫圉曰楚之所
寶齒角皮革羽毛所以備賦用是羽毛齒革荆產為
善故列于惟金三品之先

蔡傳曰揚州其利金錫荊州其利丹銀齒革則荆揚
所產不無優劣矣箋按考工記曰吳粵之金錫神異

經曰丹陽銅似金可煅以作錯塗之器越絕書曰赤

董之山破而出錫若耶之谷涸而出銅山海經曰荆山之陽多赤金柰陽之山其陽多赤金其陰多白金貨殖傳豫章出黃金郭璞曰赤金銅也白金銀也書呂刑其罰百鍰孔安國曰鍰黃鐵也是古者銀銅鐵皆謂之金荊州其利丹銀所產雖同于揚而不若羽毛齒革較善于揚故列于羽毛齒革下也

杣榦栝柏

蔡傳曰杣栝柏三木名也杣木似樗而可為弓榦栝

柏葉松身

按

孔傳曰杙似樗榦柘也鄭氏曰四木

名也左傳襄十八年孟莊子斬其檜以為公琴杜預
曰檜杙也不聞杙可為弓榦也考工記曰荆之榦又
曰凡取榦之道七柘為上是謂柘為榦也周官太宰
九貢有材貢鄭注曰材貢樗榦栝柏篠簜也杙榦栝
柏為四木傳云三木非也

礪砥礪丹

蔡傳曰礪砥皆磨石砥以細密為名礪以麤糲為稱

弩者中矢鏃之用肅慎氏貢石弩者是也丹丹砂也

箋

按山海經陰山多礪石發視之山師每之山多砥

礪鼓鍾之山其上多礪其下多砥是礪砥為虞夏時

所需物也司馬相如傳雲夢者方八九百里其石則

砥礪玄厲張揖曰玄厲黑石可用磨也是礪砥亦荆

產也竹書紀年周武王十五年肅慎氏來賓國語仲尼

曰昔武王克商肅慎氏貢楛矢石弩其長尺有咫正

是年事也石弩一名水花石堅利入鐵可銚矢鏃荆

與梁皆產砮故貢焉丹丹砂唐志黔州錦州貢光明
丹砂辰州麻陽縣有丹穴周職方其利丹銀皆荊州
地也又古以丹為彩色之名山海經有沃之野爰有
白丹青丹孝經援神契王者德至山林則黑丹出周
官職金入其丹青于守府之藏丹亦不專指丹砂也

惟筩簞楛三邦底貢厥名

徐廣曰一作箭
足杆杆即楛也

蔡傳曰筩簞竹名皆可以為矢董安于之治晉陽也
公宮之垣皆以荻蒿苦楚廩之其高丈餘趙襄子發

而試之其堅則筩簞不能過也蓋竹之堅者其材中
矢之筈肅慎氏貢楛矢者是也三邦未詳其地底
致也致貢筩簞楛之有名者也箋按鄭氏曰筩簞簾

風也

竹有二名

山海經暴山多簾筩戴凱之竹記筩簞載

籍貢名荆鄙簞亦筩徒概節而短江淮之間謂之箴

竹

箴音快

是筩簞蓋荆產也又按考工記燕之角荆之

幹舛胡之筈此材之美者也注曰荆荊州也幹柘也
舛胡地名也正義曰舛胡在楚旁三邦致貢厥名其

物特有美名天下稱善也

包匭菁茅

蔡傳曰匭匣也菁茅有刺而三脊所以供祭祀縮酒之用既包而又匣之所以示敬也齊桓公責楚貢包茅不入王祭不供無以縮酒又管子云江淮之間一茅而三脊名曰菁茅一物也孔氏謂菁以為薙者非是箋按鄭氏曰包結也茅有刺曰菁茅吳都賦貢納其包匭注曰包裹也匭結也孔傳曰匭匣也正義曰

匱之小者

唐武后置四匱于明堂命名以此

封禪書江淮之間一茅

三脊孟康曰所謂靈茅也後漢書公孫瓚伐荆楚以

致菁茅括地志辰州盧溪縣西南三百五十里有包

茅山本菁茅也以禹貢包而匱之故曰包茅

厥篚玄纁璣組

史記厥皆作其

蔡傳曰周人染夏纁玄纁絳色幣也璣珠不圓者組

綬類

箋

按儀禮曰聘禮賓朝服釋幣制玄纁束鄭注

玄纁之束玄居三纁居二朝貢禮云制丈八尺周禮

弁師紕冕上覆玄表纁裏韋昭少牢禮注祭服玄衣纁裳士冠禮注曰凡染黑五入為緇七入為緇玄則六入與玄纁蓋二色也爾雅三染謂之纁詩正義曰考工記鍾氏則染纁術也說文璣珠不圓者

字書璣小珠也

伊尹四方獻令曰正南甌鄧桂國以珠璣玳瑁為獻郭璞江賦鰐鰕肺躍而吐璣周禮旂貢注羽毛璣組之屬組綬類也詩采蘋注組綫也周禮典絲凡祭祀供黼畫組就之事天子諸侯以組為冕旒之就曰組

就詩素絲組之鄭箋曰以素絲縷縫組於旌旗以為之飾左傳熨之以玄纁加組帶焉則組不但為綬也故曰綬類

九江納錫大龜

史記作入賜大龜

蔡傳曰大龜尺有二寸所謂國之守龜非可常得故不為常貢若偶得之則使之納錫于上謂之納錫者下與上之辭重其事也箋按大禹謨帝曰禹官占惟先蔽志昆命于元龜是古者大事則卜以龜為寶也

魯頌元龜象齒毛傳龜尺二寸孔氏書傳曰大龜出
于九江水中正義曰龜不常用賜命乃納之山海經
曰岷山江水出焉東北流注于海其中多良龜史記
龜策傳神龜出于江水中廬江郡常歲時生龜長尺
二寸者二十枚輸太卜官羅泌路史曰蘄春江中有
蔡山在廣濟縣大龜納錫故曰蔡按蘄水蓋尋陽舊
治也九江在尋陽可知周書諡法解錫與也故與錫
謂之納錫

浮于江沱潛漢

潛漢作滯史
記作滯于漢

蔡傳曰江沱潛漢其水道之出入不可詳而大勢則

自江沱而入潛漢也

箋

按正義曰浮此四水乃得至

洛四水者沱自枝江縣出江而又入江潛自鍾祥縣
出漢而又入漢潛入于沔沔入于江江出為沱江沱
潛漢往復徑通矣

逾于洛至于南河

蔡傳曰逾越也漢與洛不通故舍舟而陸以達于洛

自洛而至于南河也

箋

按孔傳曰河在冀州南東流

故越洛而後至南河蓋荊州貢道從襄陽北渡漢江
登陸至南陽城南浮洛故曰逾于洛也自洛至鞏縣
入河謂之南河者豫在冀南荆又在豫南也

蔡傳曰程氏曰不逕浮江漢兼用沱潛者隨其貢物
所出之便或由經流或循枝派期便事而已

箋

按江

漢合流于荆本自相通是經流也由沱入江由潛入
漢是枝派也

禹貢會箋卷六

欽定四庫全書

禹貢會箋卷七

翰林院檢討徐文靖撰

荆河惟豫州

蔡傳曰西南至南條荆山北距大河箋按孔傳西南

至荆山蔡傳以為南條荆山也山在今襄陽府南漳

縣西北河至華陰折而東流豫州在大河之南故曰

北距大河也金史地理志豫州南陽縣有豫山或豫

州取名以此

伊洛瀍澗既入于河

蔡傳曰山海經曰熊耳之山伊水出焉東北至洛陽

縣南北入于洛郭璞曰熊耳在上洛縣南今商州上

洛縣也

箋

按中山經蔓渠之山伊水出焉而東流注

于洛郭璞曰今伊水出上洛盧氏縣熊耳山東北至

河南洛陽縣入洛中次山經熊耳之山浮豪之水出

焉而西流注于洛郭曰今在上洛縣南則是經言伊

出蔓渠郭言出熊耳非經言也

蔡傳曰地志言伊水出弘農盧氏之熊耳非是

箋

按

晉志盧氏本屬上洛故景純曰伊水出上洛盧氏熊耳漢志上洛盧氏並屬弘農故後漢郡國志京兆上雒侯國故屬弘農熊耳以一山綿亘二縣傳謂非盧氏熊耳何也伊水出陸渾山亦誤據唐志陸渾山一名方山在伊闕水經注兩山相對望之若闕今謂之龍門易緯乾鑿度曰禹鑿龍門闢伊闕即此非伊水

出陸渾也一統志云伊水出盧氏縣閭頓嶺流經嵩

縣

漢陸渾縣也

洛陽偃師縣界入於洛

蔡傳曰洛水地志出弘農郡上洛縣冢領山水經謂

之謹舉山今商州洛南縣冢領山也至鞏縣入河

箋

按山海經謹舉之山洛水出焉水經因之一統志洛

水出陝西洛南縣

今縣屬華州

冢領山東流經盧氏永寧

宜陽洛陽偃師鞏縣入河

蔡傳曰灋水地志出河南郡穀城縣替亭山今河南

府河南縣西北有古穀城縣其北山實瀝水所出也

至偃師縣入洛

箋

按山海經平逢之山南望伊洛東

望穀城之山一統志穀城山在河南府西北五十里

連孟津界舊名替亭山瀝水出此水經注瀝水出替

亭北梓澤中

梓澤地名也

入洛在偃師縣東

唐志河南有瀝水避武宗

諱名曰吉水

蔡傳曰澗水地志出弘農郡新安縣東南入於洛今

澠池縣東二十三里新安城是也城東北有白石山

即澗水所出酈道元云世謂之廣陽山然則澗水出今之澠池至新安入洛也箋按尚書洛誥周公曰我乃

卜澗水西渥水東惟洛食即是水也水經注曰安國

云澗水出澠池山今新安縣西北有一水北出澠池

界東南流逕新安縣而東流入于穀水安國所言當

斯水也然穀水出澠池下合澗水得其通稱或亦指

之為澗水也山海經白石之山澗水出於其陰西北

流注於穀其非為入洛可知

一統志白石山在澠池縣東北二十三里

蔡傳曰伊瀍澗水入於洛而洛水入於河此言伊洛
瀍澗入於河四水不相合而各入河者蓋四水並流
小大相敵故也箋按埤傳曰鄒季友云伊水在洛南
之東瀍澗在洛南之西洛為大伊次之瀍澗水小經
言伊洛瀍澗蓋自東南而西北非小大相敵之謂

滎波既豬

史記作
滎播

蔡傳曰滎波二水名孔氏以滎波為一水者非也

箋

按水經注晉地道記曰濟自大伾入河與河水鬪南

洑為滎尚書曰滎波既豬闕駟曰滎波嶧澤名也

音嶧

波

故呂忱云嶧水在滎陽謂是水也又按濟自敖山北溢而為滎注而後泄遂為汴水

蔡傳曰酈道元曰禹塞淫水於滎陽下引河東南以

通淮泗

濟為河所淫故曰淫水

濟水分河東南流漢明帝使王

景即滎水故瀆東注浚儀謂之浚儀渠漢志謂滎陽

縣有狼蕩渠首受濟者是也南曰狼蕩北曰浚儀其

實一也

箋

按水經濟水又東逕敖山北又東合滎澤

注曰澤水受河水有石門謂之滎口石門也而地形殊卑蓋故滎播所道自此始也曾南豐曰昔禹於滎澤下分大河為陰溝出之淮泗至浚儀西北復分二渠其後或曰鴻溝始皇疏之以灌魏郡者是也或曰浪宕渠自滎陽五池口注鴻溝者是也或曰浚儀渠漢明帝循河流故瀆作渠

永平中謁者王吳所作

渠成注浚儀

者是也或曰石門渠靈帝時

建寧四年

於教城西北累石

為門以遏渠口者是也將作謁者王吳修汴渠見明

帝紀云景誤

蔡傳曰波水周職方豫州其川滎雒其浸波漾爾雅云水自洛水為波山海經婁涿之山波水出於其陰

波水本作陂

北流注於穀二說不同未知孰是

箋

按水經

洛水出上洛縣謹舉山又東門水出焉注曰爾雅所謂洛別為波也又曰洛水自上洛縣東北至拒城之西北分為二水枝渠東北出為門水也門水又東北歷陽華之山海經曰陽華之山門水出焉而東北

流至於河七百九十里入洛水鄭樵通志門水在靈
寶縣西南北流為弘農澗即禹貢之波水矣至婁涿
之波經本作陂郭注曰世謂之百荅水金史志河南
新安縣有陂水字亦作陂非自洛出之波也周職方
浸波澦波水出魯山縣歇馬嶺流入汝水亦非禹貢
洛出之波也正義曰洪水之時此澤水大動成波浪
既豬言壅遏而為豬蓄水而成澤不濫溢也

導荷澤

蔡傳曰荷澤地志在濟陰定陶縣東今興仁府濟陰縣南三里其地有荷山故名其澤為荷澤也蓋濟水所經

箋

按括地志荷澤在曹州濟陰縣東北九十里

定陶城東水經注荷水上承濟水於濟陽縣東世謂之五丈溝又曰荷水即沛水之所苞注以成湖澤也而東與泗水合於湖陵縣西六十里穀庭城下俗謂之黃水口黃水西北通鉅野澤宋河渠志云導荷水自開封歷陳留曹濟鄆其廣五丈乾德三年京師引

五丈河造西水磴即此也

被孟豬

左傳爾雅作孟諸周禮作望諸史記作明都漢書盟諸

蔡傳曰被及也孟豬爾雅作孟諸地志在梁國睢陽

東北今南京虞城縣西北孟諸澤是也箋按孟豬職

方作望諸左傳作孟諸今在歸德府虞城縣西北十

里水經注孟豬在睢陽縣之東北孔氏曰宋都睢陽

在明豬西南是也閼駟曰不言入而言被者明不常

入也水盛方乃覆被矣金仁山曰自荷澤至孟豬凡

百四十里

厥土惟壤下土墳壚

蔡傳曰土不言色者其色雜也壚疏也

箋

按周官大

司徒辨十有二壤之物注曰壤穀土也豫州土宜五

穀職方氏曰豫州其穀宜五種以土壤皆可種穀故

但言壤不言色非以色雜之謂也又周官草人職曰

墳壤用麋勃壤用狐埴壤用豕壤不一而於壤之中

別以墳壚者謂下土也下土者水澤之土猶下地也

周官稻人掌稼下土作田凡稼澤是也呂氏春秋曰
凡耕之道必始於壚謂其寡澤而後枯

厥田惟中上厥賦錯上中

孔傳曰田第四賦第二又雜出第一

箋

按吳氏曰冀

賦第一或時數少於豫則降為第二而升豫為上上
也豫賦第二或時數多於冀則升為第一而降冀為
上中也是則錯出之義也

厥貢漆枲絺紵

蔡傳曰周官載師漆林之征二十而五周以為征而此乃貢者蓋豫州在周為畿內故載師掌其征而不制貢禹時豫在畿外故有貢也箋按貨殖傳陳夏千畝漆陳謂陳國夏謂陽夏正禹貢豫州之地故豫有漆貢非冀比也

蔡傳曰顏師古曰織紵以為布及練然經但言貢臬與紵成布與未成布不可詳也箋按太宰九職嬪婦化治絲臬注曰化因形移易也則臬非布可知詩可

以漚紵注曰紵麻屬則紵非布可知襄公二十九年
傳子產獻紵衣乃以紵為衣也周禮葛人職以時徵
絺綌之材於山農墨子曰古者聖王夏服絺綌故貢
絺也又為布及練傅氏集解引顏注作練說文練布
屬

厥篚織纊

史記作其
篚織絮

蔡傳曰纊細綿也

箋

按小爾雅纊綿也絮之細者曰

纊徐州之織縞鄭康成曰織細也豫州之織纊孔傳

曰細綿也蔡氏徐州傳曰織縞皆繒也至是乃以織續為細綿則仍以織為細矣

錫貢磬錯

蔡傳曰磬錯治磬之錯也

箋

按周官太宰九貢有器

貢鄭注器貢銀鐵石磬丹漆也考工記曰磬氏為磬倨句一矩有半其博為一股為二鼓為三假令磬鼓廣四寸半者股長九寸鼓廣三寸長尺三寸半厚一寸太厚則聲石而摩其旁太薄則聲播而摩其端故

必有錯以治之小雅他山之石可以為錯集傳曰錯礪石也孔疏曰治玉石曰錯以不常用故必錫命而後貢也

浮于洛達于河

浮於洛史漢作雒

蔡傳曰豫州去帝都最近豫之東境徑自入河豫之西境則浮於洛而後至河也

箋

按山海經曰洛水成

臯西入河水經洛水東北過鞏縣東又北入於河是洛水東西皆可入河由洛陽城南經偃師宜陽永寧

至鞏縣東以達河此豫之西境浮洛而後至河者也

魚豢典略云漢火行忌水故洛去水而加佳然周書有作雒篇周禮其川滎雒皆作雒大河自

潼關流入閿鄉達靈寶陝州澠池新安洛陽孟津鞏縣此豫之東境徑自入河不事浮洛者也然浮洛達河而後豫州之貢道始全

禹貢會箋卷七